

四庫全書

集部

欽定四庫全書

集部

熊峯集卷八

詳校官監察御史_臣曹坦

中書_臣劉源溥覆勘

總校官進士_臣朱鈐

校對官主事_臣陳文樞

謄錄監生_臣施華

欽定四庫全書

熊峰集卷七

明 石珪 撰

詩

四言古

述始

於皇崇祖植義豪郊板蕩越疆神鳥寓巢回荆故都革
緇正緇增墉廣田以培以條維伯仲季戴富戴有戴碩

載阜以貽我後曾祖皇皇震器是將既經我晦益樹其
桑肇造文業聿興義方冠裳肆好俾遊于庠我祖孔達
閔銳見末爰抱三傳如飢如渴有髮斯總才莫我越羣
師相雄一鼓而奪莫顯匪文莫大匪倫臨晉于鐸文敷
行惇諸生循循五經紛綸士習有立風流于民攝行宰
政以教為令蠢彼細氓往蹈于阱迺蒐迺羅覆謂我縱
韶陽之謫湖利是正人皆戚戚往覘公色奚遠而欣有
道是式維出與處如語如默橫流度江宅于炎國龜勉

陳力奉天應時庚桑能化柳下不卑瘴雨為沴耻賦式
微歿壽曷貳我願則違烈烈祖妣豫章出徐義正掩衾
澤存束書勇不難死乖道迺虛瀝血祿嬰北懷散廬江
水瀰瀰鳬鷺蕩止我心有傷曷惟其已長鯨巨龍有戟
其齒志存趙孤即隕無悔維帝相忠載徒載航大節既
完遺骸亦藏烈日明明有嚴其霜我公克念實嗣其芳
家造孔艱一得百喪脫簪授經以泣為杖大科既捷繡
鉞斯抗貞節顯褒允也非妄曷統匪垂曷則匪作我公

昌之有穰其獲正色我聲衆枉錯愕松栢之姿振而不
落人咎公直公曰我平安能低卬以趨衆稱人咎公方
公曰我正毀廉刈隅實拂乃性王事靡盬載馳載驅中
饋允吉內言不踰肆我恭人實勞實劬匪機匪刀爰字
我雛維茲伯氏克踵前武抗顏在廷亦既有斧我德則
涼游藝之圃職雖論思袞闕曷補公曰爾兄暨爾諸弟
爾讓爾友是為錫類我有清白以為汝遺我有不欺俾
汝不匱翼翼其庭有訓匪邈載瞻載仰四世伊託周源

孔津公教所泊我小其浮颺焉有忤巖巖丘山公戒肖
之懔懔淵水我實蹈之潛德未揚慘莫道之悠悠蒼天
莫鑒我思

遠遊

君之出矣遊如之何朝覽冀野夜浮滹沱帝子不逢中
流揚歌高鳥墮雲游鱗遡波曷發崑崙曷濯洧盤禾黍
蔽野童欣耄歡新聲在梁清酒在尊聊以永日以抒憂
煩

謝桑園子送山丹

有灼其華綠莖丹葩我思古人德容孔嘉南有赤烏其
聲安安我思古人為家孔艱朱鴻翩翩載宿于渚亦有
駟馬服我車下維葵維藿可以療飢維山之英與子樂
之

五言古

芹香別思代郝立夫作

泠泠堂中琴肅肅階下羽藹藹來冠衿森森日鼓舞及

時惟春風萬物待朝雨射師示正鵠學者識規矩誰悲
鄭虔飯自誨宣尼脯白髮顏可怡青天色不憚朝游仁
義淵日夕宿藝圃清風起芹末幽芬在庭戶至樂紛兼
三達道亦由五寸心良不欺持此報君父詎謂臣之忠
必待分圭組娶緯知憂國叟廢知獻主况茲擁臯比何
翅什與伍亦有待問鍾不獨攻堅斧行聞棟橈篇餘韻
更縷縷

雜詩二首

雪霰紛瀉瀉忽然見朝暎水霜隆盈地中有青苔痕
幡幡鳴春鳥解使朝變昏果哉烏鴉白不謂黃河渾
小雅歌緝蠻陳王悲豆根此曲勿復覓子蘭方在門

其二

鷄籬無高鳥牛涔無巨鱗物大會有合淺小安足陳
藤蘿附松栢繳繞固其真桃李雖不言吐華自陽春
齊魯事口舌秦人如鬼神末路多此比龍蛇貴存身

五月大雨

仲夏月幾望蘊隆何熿熿洪鑪鼓元氣烈火燔層空陰
谷絕爽籟齊紈累無功鳥疑焚其巢翼扇飛不翬東方
有雲蓋裊裊來天中崩騰蹴萬騎閃爍張琬弓雷電動
俄頃滂沱灌羣叢不有明神力蛟龍詎能通憶昔漢中
造此日生髯公昭烈帝子胄桓侯萬夫雄翱翔歷郡國
意氣驅羆熊走馬萬衆間斬將如發蒙刮骨不動顏志
存安有躬炎燼再吹噓白日諒精忠至今百世下栗烈
增嚴風威靈行九天霈澤垂無窮三驅獲魍魎一怒號

豐隆宣威懸弧辰伐鼓聲隆隆憑軒良悚然仰看氣成虹

真意堂詩

大道流宇內羣形各含醇紛紜千萬端率性固其真高
鳥凌風翔游魚翕其鱗天淵苟易置拂鬱詎能伸卓哉
孤貞士築室西江濱盼菊以怡顏意與鳶魚均兀傲踈
籬下不知累重茵赤芾稱戎冠物假吾之身勃然見真
吾此樂難具陳真意良在茲高吟謝市塵

擬古秋懷

弱齡希仲尼無位非所患寧知歲月駛白日旦復旦才
逢春英隕更睹秋河爛溫涼轉世象吐吸步仙算雖非
北海豪却比東山慢緬懷千古人落葉視微宦忠肝奪
霜明雅志戒物翫色潤貞觀業筆轉奉天亂縱無浴日
功夙夜不停翰仰山益慚高涉途恐廢半願馳騏驎足
不負孫陽歎

九月不見菊

九月不見菊茲襟若為開深巷有酒家喜聞潑新醅朝
回往叩關酤取三二杯當軒斟酌之況復臨高臺雖無
露英掇西風亦時來百慮忽已祛聊復優游哉緬思靖
節言無絃未宜猜天真會有得魚鳥自徘徊感此坐已
忘兼欲停尊疊浩歌星月前餘興良崔嵬

偶書

青晨罷盥漱紅日已篩影東風雖應律尚逼重裘冷徙
倚餐朝霞用意貴精猛乃知塵紛中萬動輸一靜食君

數石碌疎散亦已幸覽此床頭書千古得馳騁所嗟志
難持人事亦易屏或恐被嗤責此去當笑領

元夜

山林有夙約駕言至東門倦鳥翼斯斂迴翔正翩翻呼
兒上市頭所買燈亦繁并剪鏤紅雪照夜光輝存濁醪
三兩觥百念胷次屯望月憶親顏素餐忤君恩出身逾
十年尺寸無足論長恐秋霜生壯志託空言請謝門前
轍深居涵性源

中秋對月

華月出東海萬國同中秋
水輪轉碧落風露聲蕭颼
坐數寒桂枝扶疎應九州
老兔毛欲脫杵舊不足謀
瓊瑤十二重空鎖嫦娥愁
天道日左旋長河亦東流
人生望朱顏靈藥安可求
不如天津橋幸遇董糟丘
一笑萬事失黃髮昇瀛洲

寒泉濯足

翩翩黃髮翁濯足巖下水
吾志在清波世事如脫屣
青

山長悠悠白石亦齒齒千古孺子歌誰能契斯理

南薰午夢

寄傲北窗下無思日遽遽前林交遠陰薰風入吾廬羲
皇千載上夢或與之俱寤言盼庭雲對之時卷舒

猛虎行

南山有猛虎聲勢何咆哮野豕食殆盡無論鹿與麕山
徑行人稀田事苦莫拋叩鉏下危岡秉火仍喧呶誓將
棄此業往適彼樂郊丘中有遺髑哀哀婦人哭

黃雀

小小黃雀羣鮮鮮刷毛羽躍躍笑飛鵬啾啾學鸚鵡
雀來吾語爾爾德焉比數乾鵲能知風商羊亦知雨
睢鳩知定匹慈烏知返乳爾既無可稱喧囂競為伍
竊穀不厭多趨炎赴堂宇天下羽族中吾於爾何取
去去遠吾廬莫待我鳴鼓

勵志

日暮飄風發掩身固重關深居擁裘褐一榻危如山
楫

拙奮殘燼稍亦能祛頑炎涼固人情道在意自閒呼童
命濁酒一飲便酡顏酡不足羨豪氣時往還仲尼道
高美可望不可攀學聖聖之徒不學髮斯斑若射就由
基若木就輪般致志在躬行能言固非艱烏獲未謂強
匹雛詎云孱不見鄒國人浩然塞兩間

春日郊行

驅馬薄言邁悠悠歷阡陌桃花照人紅柳絮隨意白舊
巢飛燕入高樹鳴鳥擇水流金勒駒草藉青油軛舞蝶

下新粧落梅點宮額那堪繁盛時猶作羈旅客彈劍發
燕歌木葉驚撼撼太息日月流何翅驥過隙貴家磊珍
寶萬金起高宅心雄百代人身作九州伯撞鐘集舞女
建旆列畫戟盛運一朝變蕩滅無遺迹乃知身後先貴
賤未可逆幸對一尊酒春意何其適放浪脫形骸談諧
鉤隱蹟不知秋菊英安問歲寒栢錦綺賦百篇金聲試
一擲不負春日陽草樹俱澤澤

悼亡

驟驥下長坂日月雙轉轂容華易消歇奈此光景速結
髮與君歡繡簾映華屋芙蓉為君面秋水為君目佩君
宜男草飯君落英菊誰知綽約姿棄置在山谷淒風偃
蔓草猶疑靡羅穀皎月射危坡哀烏號古木安知下泉
人不念我幽獨君無兒與女誰為君斬服白楊漸有芽
二月酒初熟荒涼隧道外徒使奔童僕紙錢燒作灰素
手豈堪掬拋殽在中野祇充饑鳶腹迴風從西南裊裊
如紡軸未知是芳魂瞻望令頻顙伉儷雖人合乃亦繫

骨肉顧彼雙飛鳥安能不反復語盡情未舒聊以歌代哭

碌碌何足道

為學二十年聞善思允蹈四歲知詩書八歲勤灑掃十
三為文章光澤春雨膏十九學漸富士林有稱號瀛洲
名濫入君親恩未報高步望登堂爝火求就燥迄今又
十載不覺壯夫到彬彬猶未能碌碌何足道

病驥吟

良驥本龍子病來失風雲北風振長鬣猶念萬里勤朝
飲長城窟日夕秣崑崙意氣輕百戰功成大將軍漢家
麒麟閣丹青貌殊勲駮駮棄道傍哀鳴人不聞四蹄空
踏鐵五花不能分平生感一顧何以報明君

述志

五采莫如白數動莫如息貴名幾喪身嗜利竟死食首
陽垂令芳顛顛亦云極矧茲末路塵鉤曲亂弦直胡為
佩芝蘭役意強脩飾吾聞上古人無為日玄默避名若

深淵安辨淑與慝駕言往從之相忘於道德

夏日二首

夏日本多暑百思併予嬰呼童灑庭內几閣稍淒清燕子自來往雞孫亦生成深林來客踈古甃有苔明薰風何拂拂朱絲非我聲

其二

夙昔念遠遊抱疴願多爽坐觀流景速池霏綠初長庭樹漸鳴蟬葦門日恒敞潺暑苦中人棲雲猶潏潏安能

吹清角暫與豁幽賞

漫書

炎炎積暑意耿耿抱深懷雲含雨遲落鳥呼風不來疎
林滯清響幽客卧高齋暄涼雖殊態謀道詎云乖獨披
牀頭書如與古人偕曠思倏無極焉能顧塵埃

園中

董子下帷日三年不窺園而我希躅人胡為出屢繁遠
風噓病骨百念跬步存新燕雖好音不能盡欲言回首

告稚子夕陰已盈門

夏日憶京師

雲意夕已集晨初鳴雨繁鳥情急繞樹蝶拍亦翩翻芳
圃綠逾靚藕花紅不言憶在京都日屢尋山水源妍景
宛相似朋侶亦俱存所殊多病及猶掩去年門沾巾雜
簷溜聞笛銷旅魂忽恐秋霜落沉憂感鬢根

漫書古體

僻性鮮諧合樂聞長者言忽從黃綺遊曳履過東園徬

得意自適杯飲禮不繁
下論暨秦漢上談邇義軒
麋鹿卧我側羣獐戲相援
睹物契至理歸求吾所存

對雨

午寢山鳥來乍起倦無力
遊颺素帷翻急雨銀箭直
初添地氣爽倏作簷聲黑
炎氣驟失勢庭樹或改色
我雖非農夫情亦欣稼穡
養氣徒浩然抱痾苦偏側
所幸風雨時得收黍與稷
歎歌濁酒前可以寫胸臆

夜坐

微月倏已出明星裁數箇露來花上繁雲到窻間破誰
家擊鼓聲忽有驚鳥過

暑中

暑氣連日惡坐甑有此語庭除日已滿況復少茂樹清
風呼不來灑汗欲成雨喘發但狂奔棲鳥亦刷羽寒思
水在咽渴望露澆腑誰能起秦青高歌木葉舞暫與豁
塵煩坐我澄江許

立秋

造化妙生息貞元互為機坐見夏木林忽有秋葉飛新
涼化炎歎此意亦已微誰令西南風颼颼度窻扉窮士
悲物變哲人貴知幾仰觀斗柄移歎息聲未希

古詩

器微滿乃溢才備德不形大功有神軸至平惟水停不
見唐虞日垂衣臨廣庭運動物不覺端居天下寧作誓
民始畔勤盟血徒腥何況衄敗餘繼之以幽圉古道不
可復誇詡類俳伶藐視三皇業嚶嚶如小星自謂臯契

出不希麟鳳靈俯視秦漢士牛涔間鯢溟大言久不作
吾歌安足聆

余既病目逾年竊自痛悼迺憶古之賢士亦屢
抱病漫作病士諸詠雖與靖節詞旨不同質
之原思亦復慚負讀者體其情耳

子輿本達士曲僂當盛年輔車下參脅會撮高指天陰
陽氣有沴中心良獨閒日勤平生言鑑井方便躡造物
等傳駟乘之隨化遷俯安支離形言笑恒晏然漢廷論

遺直無如汲長孺面數平津姦庸知武安怒將軍感長
揖君王為冠履賜告禮已勤拾遺志猶固矯矯社稷臣
淮陽迫遲暮千年仰餘風理欲為君悟上林多奇獸萬
乘受手格耀武誰掄揚臨邛有詞客駟馬志何壯千金
價非索渴卧歸茂陵文君亦頭白負弩夸先驅琴心貽
內熱爵祿雖未充聲華固軒赫魯人固多冗不獨叔山
子亦有申屠嘉談精畧相似操幾耽至言遺形契真理
肝膽或楚越何況顧與趾能感高蓋朋視之若脫屣咻

笑雖塞塗方遊太虛始

漫書二首

化機流宇內浩蕩春如波性命豈吾有陰陽惟委和至
人率真意俗士較寡多天功為己力百感形泣歌欲識
榮衰理請盼庭前柯

其二

騏驎日千里捕鼠愧狸狴魯難伏鵠卵越雞良不能小
大固物理鷦鷯等鷗鵬得造境自適入真化可乘何必

朱門戟可以易樞繩

中山酒

中山有旨酒自昔聞其名
倦客驅羸驂主人有佳情
呼童具一斗酬唱多鉅觥
耳熟增逸韻慷慨道衷誠
憶當玄石飲三年然後醒
形化託丘壠妻子泣嚶嚶
西來剖棺歛相勞若平生
驚倒里中父行人竚屏營
豈有大聖藥能歛神氣精
豈有駐顏飯如彼瑤瓊瑛
束縛不能害泉扃若通明
嗟彼野史言荒誕安足評

病言

多病欲無言淒風感心曲十年侍明光羣書校天祿冠
佩含春風翱翔總鸞鵠素飽愧未湔拾遺夢空觸豈期
揮翰手欲展扶藜足竹簡經蠹穿冒襟被塵梏雖云日
偃仰亦復成局促非不思古人知榮守其辱雅志良難
酬歎息聲相屬

慈烏吟

啞啞城頭烏朝日帶寒輝唧虫哺其子直下草野飛天

寒老雌獨日暮望雛歸啄粟至已晚長恐摧羽衣下有
倚閨母歎息聲未希遊子在天涯四牡恒駢駢

有所思

蘭皋步余馬騁望登白蘋美人隔江渚夙昔相定言遠
道不可見深思歷寒暄世運如轉轂秋霜變春顏出言
雖有章佩服多蘭蓀妍醜懼相形心肺日翩翩翩翩詎
有極君子貴容德

冬至感舊

兀兀坐虛簷茲晨日長至念隨供奉班風雲動高思鳴
環待宮漏擁笏趨嚴地謹身殿初啟聖人在高位徬徨
日月側親睹天顏喜三號聽雞人四表瞻光被遠方致
琛賮車馬陳廷內豈徒列炬輝賸有鸞聲噦聯袂歸鳳
池歌詩亦鳴治那知風雨惡抱憂忽逾歲巖穴隔重華
秋鴻但垂翅起窺一陽生臨軒墜雙淚

感興三首

世路險且迫冰雪滯行輪歲暮安適歸西方有佳人采

薇食芝實聖主不得臣誓欲往求之為叙累世親淒風
吹我衣龍劍欲張鱗豺虎鳴道旁君子有未仁悵望不
可見慨歎而傷神

其二

至清則無魚至察則無徒山藪貴藏疾大川恒納汙仲
舉見已晚元禮隕其軀疾甚廼主亂反以瑕敗瑜嘉木
未易茂荆棘可勝誅所以明哲士但在守德隅周詩歌
穢狃薄伐不窮驅

其三

鳳凰翔千仞鴟鵂嗜腐鼠卑高各異性
戈長不春忝至人等彭殤鳥獸可同處
君子慎辨物擇身貴得所寧為昂昂駒
不作鷗鷖與鳧銛
雖易缺白璧終難污棄置勿復談
祝鮓言孔甘

春日

春鳥鳴漸和遊絲條輕颺寒蕪吐新碧
冉冉堦砌上憶昔初結交所遇多僮孔
楊謬見數沈鮑惟堅讓含葩

當盛日發耀亦炳烺朝吟昆明池暮集金門仗氣勁志
靡奪歌悲節逾壯那知日月速朱顏易凋喪綠髮日以
踈驩娛成惻愴感此花木辰潛然泣相向

夜坐同兄

明月出東方蟲聲初在戶宿靄倏已收庭堦出芳杜流
雲翻細波坐對喜欲舞秋色何悠揚龍泉碧花古緼袍
良非貧所貴在清素况值宵旰勤側席思口苦紅日關
寸心移孝固其所豸角養既成山龍門應補乃知南阮

心不以萬金富

燕將雛

飛飛梁間燕可憐日將雛雄雌更出入羣兒恣喧呼城
南虫蟻少苔花濟餘鋪皇皇往求之似畏西日徂豈復
惜舞翅譙譙大勞劬聲音覺漸長羽翼齊已無會須見
返哺詎後庭中烏

夢西湖

山靈有宿約寤寐應未爽高韻擺塵俗幽思入無象分

明桃花潭春水增十丈遲迴虎穴傍展轉不可上平生
志多違萬事一悵惆出門見明月悠悠興深往

書秋

炎駕煽中宇海沸魚龍顛梧井葉倏墜錚然簷騎鳴白
露晃丹葉明河瀉長楹坐見螢火流涼思驟能生平生
不習暑况茲多病嬰濯手理黃卷前除淒以清微颺度
脩竹木杪下秋聲不待張朱弦兩耳已開明俯拾青莓
苔宿靄自盈盈移枕頽簷下簪紱欲忘情

送邵國賢分韻得引字

君帆已南下僕念日旋軫豈謂萍水分如失繩與準平生東朝歡肝膽屢得盡曠然趨大塗一笑破畦畛器鉅用不微多士宜汲引誰撞待問鐘虛往歸必秬吾聞凌霜幹乃自堦下筍願培正直姿出身濟時閔

雜詩二首

世路多窘迫曠然同衆趨發步未成矩榛棘已盈塗行人笑蹙蹙自顧益躊躇暫得美蔭息似欲忘其軀豈敢

厭紛濁頗能遂跡愚乃知佩明月不如服草珠雖有萬
金鼎所安在陶孟至德貴惜翳皂白始興誅珍重廣成
訣靜看雞與鳧

其二

皎月邈中天清光照無極秋毫森可數萬里經一拭寧
知黑水潭其下深莫測龍蛇方蚘蠕白日鬼爭食居人
自凜凜行者為惻惻乾坤有遺憾周孔不盈德安取混
沌鑪萬象鎔一色臯禽不知素城烏不知黑大化康衢

人不知復不識

雜詩二首

辛俞從欒子寧畏大戮施欒布事梁王冒險猶陳詞古
人守節義豈在崇與庫意定蹈湯火志明羞詭隨寧為
白璧碎不作脂與韋寧為鈍劍折不作鉤與錐彼視富
且貴草芥奚足為正氣日淪喪功名始多岐射利等趨
市廉耻棄如遺雖有首陽薇莫療夷齊飢荆卿與灌夫
末路未可嗤

其二

節鉞不期傲金珠恒自豐物交中乃移至詘豪與雄疇
能讓田畔斲榱竟不龔訾拓雅端博張老仁且忠不有
賢哲言主名安取隆所以公與卿下士貴從容諤諤有
深惠唯諾禍所鍾勿怙圭組貴軒鶴笑寒鴻苟移造物
柄簣土亦易崇高臺置郭隗蒲輪起申公此道久不作
紛紛暗與聾

對雲

庭除若偏仄況乏林與溪浩志罔所投日長對雲霓岌
業聳千仞犇騰散羣麕暫逐健鶻上遄同歸驚西取物
良不窮入真相與携更思窺玄窟待月升華題

秋日

秋日晴自好遠空明鴈書雲淨碧峯出綵戟列吾廬隆
葉填古井積潦自成渠雖當搖落辰壯志尚有餘真欲
乘長風浩蕩遊六虛倘遇廣成子試與談太初

蛾眉山

驅馬歷長阪溪流縈且迴俯聽寒泉聲斷岸亦崔嵬星
斗耿深光古道各徘徊雞鳴喜達曙努力進虺隤晴旭
掛林杪巖陰倏然開始見蛾眉山蒼翠出灰堆主人綰
銀魚勞問列尊罍探奇試漱石懷古復登臺感彼郭與
樂疇昔萬金才功業那可見英爽久沉埋悠悠百代下
松栢等蒿萊乘時登雲霄失運墮塵埃雲霄與塵埃畢
竟安在哉不如飲美酒笑傲破羣猜

南溪雨歸

南溪豈不佳碧沚漾輕舸柔絃日淒清花樹何婀娜境
勝簪易集適到意多可苦為急雨催未得長坐我倉皇
出籬落萬弩縱銀筇飛鞚捷澗獮復惴道相左冠裳信
滂沱蓑笠悔失荷望中岡與陵所遇乃坎壈振策行復
呼饑僮踣而跛淥流橫奔壑角觸浪交嗟疾雷躍我前
避電驚蹈火平生嗜臨眺有約屢未果奚為奉遺軀小
視類螺贏玩物幾喪真懷土信多禍下馬結沉思從茲
戒游惰

偶書

浮梗已汗漫託棲仍未寧身外雖無餘舉目亦充庭十
口可誰捐敝笥滿六經紛綸繫手澤不獨遺氈青疎琴
載餘響瘦鶴驅伶俜轉徙諒非難肩輿恒未停物貴心
反役豈為善存靈細詠卜居篇永服陋室銘

憶遊南溪

雅積山水懷自非簪纓質屢辱知者招頗祛愚蒙疾南
風初滌暑出日自逢吉峯巒千里秀禾黍望時實始泛

南溪舟兼鼓鉢已瑟中流躍文鯉萍藻亦何密茂樹鳴
時禽雄雌若相失地勝詎因人吾遊幸終日清醞坐銷
憂浩談忘促膝明珠公勿靳此有鮫人室

養生答張進之

殉名思馬革殉利同即蛆智僅脫虎口忠能葬江魚前
蹤後愈憤衆毀吾獨譽勞神役百感所得惟高車一念
忽超脫萬事皆成虛行止但無心亦如雲卷舒放浪廣
莫境優游心遠廬黑白非所計且願復其初

紀夢

夙昔夢飛騰中年羽翼短有時暫凌霄意願每不滿內
省知志衰前行任塗坦如何今宵夢復似奇與誕偉然
登廟堂受詔亦不緩還提三尺法往雪九秋旱所恨事
未竟遊刃中肯竅一回幽谷春更為塵國澣雖非無夢
徒猶勝但酣懶

秋郊

湖山縈宿襟危眺偶一豁葉脫峭峰見烟霽平野闕下

馬遵石堤廢碣蘚可掇昔人來歌地歷歷增慘怛事去
朝露空安辨窮與達吾儕際清朝復此謝轡轡嵐光舞
宮寵風物療文渴坐對古今變萬類等毫末猶思勤鍾
鼎一繼伊與葛

夜寒

永夜寒氣生屋低仍積草引燭爇乍紅和燠徹肌表擁
衾坐稍安萬事塞幽抱城漏何淙淙東南有鳴鳥起窺
寶劍光報恩人未老

曉寒

樹杪煙籠葱樓鴉噤無語寒日上三更遲茅簷試延佇豈
無濁酒觥惡醉每慚舉敝紬幸多絮不待砧與杵掩戶
坐屋角拳跼稍得所雖無聖賢對正自潛心處迢迢長
安道飄風逆行旅

自惜二首

淵潛夙知名霄舉頗負志誓探東觀書仰作尚友士黽
勉二十年十事九失意中遭家造艱屢為積病制壯顏

忽改色修途更垂翅賈生徒經邦馮衍空抱知寤寐明
良詩碎首亦不易坐見流光馳報德恨無地

其二

青松蒼為薪不異蒿與草白壁剝為泥安睹為至寶雖
有文章姿積瘵苦縈抱芳春失歡娛白日成懊惱六經
箋疏繁一變疇至道意盛歲遄徂榮華條枯槁伏櫪心
尚雄凌霜幹須老造物苟曲全安能遂卑小

春日雜言

晨暎映林薄庭除鳥微喧雞號猶未倦宛轉登高垣嚴
氣尚欺柳寧到荷與萱時復古壁上土花回綠痕歲月
感徂邁幽衷難具論坐使壯夫顏青銅照霜根馮衍已
不偶袁絲意徒繁何處商山芝復近東陵園策杖一長
往居然謝塵喧

南園

古城繡春草翠色交短垣夭桃開何遲李花正翩翻平
畦森綠甲圃人初列藩汲井水易渾輓綆意已繁隔塹

聞鳴蛙蚯蚓寂不言坐感清明風幽襟愜素園

過羅園

取適憩林薄道心幽且閒園蔬日已長零雨時尚慳
井試溉之菲菲綠增顏雖無千章木桃柳自成環日出
風淒人日入鳥下山抗意世塗表悠然忘險難

雨後

久望始得雨耕種猶及時城苔乍回綠港柳俱垂絲
跳踏集坎窞取樂無高卑豈徒物性欣童耄各信眉樵歌

不擇譜成文聲自詩一唱世昇平再賡孝與慈穆風戛
新戈歸雲變妍姿仰見北山出美人有幽期

初夏偶書

春服仍衛病坐與童冠違暖綠雖決決風詠未同歸轉
盼百花盡輕綿逐人飛新鴉已出巢習習有光輝人生
非彭喬昔鬢今已非若欲築高臺高臺竟何為六貴豈
無紱五侯亦分珪往者繁盛名所遇多湮微東南爽氣
發柔桑綠成圍欲適千古意未可厭深杯

夜作

斗水入鬻釜薪然初沸驚寸蟲滯幽陰逢春各飛鳴人
生值命薄所遇多不平狂草未盡態豪吟豈勝情醉拍
青瑤闌仰見白氣橫六合堪一俯千年藉孤撐棲雲固
無心化日寧揜明意劇獸欲躍機忘鷗頓盟南尋羨門
子共憩黃金城

早行

雞號出村巷涼颼欺宿醒雲開忽見斗東方漸熹明落

葉墮馬前舞意亦輕盈殘月隱樹杪眉黛不勝情病客
自多愁况乃聞秋聲一步一嘆息恨繁足屏營人生安
即樂豈必公與卿要當識尼父從好勝浮榮

秋意

雲疎月吐華葉老林張繡淒清意獨苦蕭爽氣初透白
鶴飛又還青鸞報何後卧聽銀浦濤人與秋山瘦

靜逸二首

至樂本無聲簡言始遺味至治本無為用察乃興偽飲

水終自樂抱獨仰何愧強置方丈筵欲暢顧多累謹
誌已馳將送禮復贅安得同心人忘言日相對

其二

太虛雖泱寥二氣自闔闢山嶽雖不移萬物自生息誰
言吾靜拘吾靜乃得逸居靜淵水明行靜岩月出應斷
亦不蹉百感難混寂豈必歌繼諱方能謝忻戚

讀沈東山老先生所寄先君輓章

不見東山翁荏苒二十霜几杖日已遠寤寐恒未忘尚

憶垂髫年兩親俱在堂進有師友樂退得父母將歲徂
事倏變拱木森墓傍遠勤平生言芝蘭有餘芳猶道管
鮑交亦勉男兒強盛篇憂金石沒世垂鴻光道脩恨莫
報徒憶鬚眉蒼

有答

夷吾繇檻車郅憚脫狴犴時來齊業興策售亦匡漢丈
夫生世間立志貴侃侃多少英與賢未遇恒患難况復
抱貞士富貴非所憚豈為雲林深白首輟篇翰漁父歌濁

清牛人詠夜旦雖萎蘭亦香不雨雲自燦終然千古下
忽有知己歎黽勉讀且耕歲事行復換

殘歲

山城迫歲暮闌街兒女喧老氓來負布偃僂行且言雜
果陳道側列園多雞豚穀賤不敵鈔祀事安可喧明時
宜豐樂徵索無乃繁豈獨吏治敝奢風變丘園婚嫁盛
紉綺肆筵亦勞煩况復夜晝飲不計罍與尊生事歲幾
入費出乃紛綸豈不有稱貸旦暮聞扣門

移居太僕街

從仕二十載卜居亦六七身世任蓬轉無問喧與僻最
後移闕西地位更平直趨鼓向啟明遶盡宮樹碧城遙
漏聲杳起望恒竚立憑仗寔間禽晨晦有消息迂慢恐
非宜取近愧寡力暫借鷦鷯枝豈敢望安逸

擬古別離曲

君向吳中去妾上高樓望忽聞南鴈聲夜久獨惆悵水
西雙鷺鴦水東一鷺鷥未會芙蓉意藕絲空爾長

同年會分得是字

暮春清且煦，賓御此燕喜。豈無絲竹繁，德音快盈耳。
憶昔同升日，黑髮俱相似。荏苒二十年，頗覺踈舊齒。
及時當亨衢，一一被金紫。入為家庭光，出致邦國理。
長松晚益茂，大道行可止。往古多才賢，閱世固如是。
離合豈足歎，造化有終始。珍重斷金心，垂芳共青史。

夜坐次舊韻

草色映明月，微風生遠松。去年南浦雨，今夜北窗鍾。
紈

素未應棄煙雲何太工山林有隙地投散亦投慵清夜
有涼露庭除多綠莖正憐嬌烏語忽聽焦蟬聲浮雲自
西來新月吐微明安得挾黃鵠與子共遐征

奉荅兄次韻

秋日忽已悽小軒納殘照西峯入吾眼振迅思一嘯藹
藹棠葉紅千載獨懷名豈無雲臺勲不寫子房貌五斗
淵明歸千金魯連笑何況末路塵錐刀計多少鼂技安
足稱螢火聊自耀所以希聖徒出處非偶剽餓寧饜薇

藿一子甘衆誚坐翫華月升逸興飛遠嶠

丁卯元夜立春後七日始雪

燈火已春夕風日亦暄妍望雪意久倦桂屑忽翩翩豈
獨農父喜啣杯話豐年疎梅老屋旁乃見清遊仙驚鳥
踴而啄臯禽互盤旋白馬嘶長風搖搖載金鞭況聞天
日開斥邪用才賢枯朽得吹噓窮谷免顛連暫留上岡
田願出新丁錢敢恨衣縷單十口幸復全小臣性惻怛
聽言欣且憐更祝雨及時呻吟變歌弦酌酒盡餘興醉

下江東船

南望湖

牽舟乘流上日行不百里春冰已到海魚龍未出水地
涸泉脉細天黃塵霾起清波間長洲盤桓進復止豈徒
旅色愠三農未有喜青青壟晦麥沙礫壓欲死蒼天亦
何意不復閔赤子科徭豈宜緩公事聚如蟻無雪蝗已
兆鮮雨旱恐繼縱多良有司焉能救瘡癰臣願告九閭
旁求到胥靡甘霖徧海內新綠生地底吾當沽濁酒兼

欲致雙鯉浩歌下長川痛飲濟州市

夜泊七級偶書

泊舟七級口夜久灘濤濤輕風搖水光燈下老魚出繁
星麗霄漢經緯誰與識稍喜春泉通新綠添數尺金陵
在吾眼公期未可必坐感節序換安得不華髮人生謂
如寄有志貴取適此理未易言千慮望一得

憶古二首

好花生堦間風日晴更好有時風雨來不異堦前草

其二

情欣見花好情乖見花惡
須看老婦手亦有調羹錯

九日遊靈谷

地迥意森爽秋水潨復流
萬栢夾修徑古松枝相樛
寺門窈且深臺殿若雲浮
布席列笙歌同心日遨遊
有時狎麋鹿忽爾侶羣鷗
心曠境殊豁山深吾可留
不識簪纓貴豈復茅茨羞
山谷宜有靈賓友此倡酬
坐閱寒桂影出門無所求

再遊靈谷同陳大理崇之月下散步

乘月下鍾嶽山深氣增爽高松偃萬蓋幽澗逸清響扣
關碧雲隈適與棘寺往縱嘯起巖鹿狂吟搜象罔金磬
杳靄間瑤臺鬱森上客去主未發天遊意徒攘名都富
佳麗一代列宏敞依龍地盡濕向日木先長風鳴萬年
榦瑞出九華杖漫與林僧談餘興入蒼莽

松聲

閱世苦多累息此嘉木陰坐翫礫砢節孤高契芳心遠

風自東來乍如鳴素琴
漸竽密籟沸劃變戈矛森棲鳥
各去枝間雲亦辭林淑氣不爾嚴
蕭瑟有此音感之髮
疎豎起聽更斂衿調律豈無意事
大力不任覆餗明在
塗敢試鼎與驚歎息偃庭際出門
春已深

雨後思欲一遊牛首漫爾賦之

春初見牛首浩欲覽其顛日短多
淒風塵鞅苦糾纏今
辰雨初霽遙山斂蒼煙思得賞心
侶一漱山中泉清願
動有違老驥空翩翩惜名不顧身
倏忽過流年伊周固

洪烈莊列豈不賢人生貴適意華簪非所憐

瀛洲即事

長廊古松栢深院畫風雨水煖荷漸出人靜鶴獨語碑
垂玉亭記前哲留踵武壁載伐桑說近事亦快睹紕厓
本公輔愛與聖賢伍題詩徧池臺置筆及牖戶甯菴雖
峭拔言動蹈遺矩獨開論文榭不出彈碁塢時來各飛
騰此地自今古庭竹猶餘青隣峯翠可數去歲吾始入
治塘亦䟽圃豈望菱芡成不辭菜根苦春風不改和夜

月明如午一觴時嘯傲萬事付毛羽

午坐

輕風度松籟庭閒午更寂倦鳥貪熟眠幽草何歷歷新
鶯忽一轉宛若江上笛翩翩葉間蛾盡日何所覓時物
自生長吾性亦順適臨池翫清寒倚竹聆淅瀝誰言牡
丹叢不道蘆與荻真意苟自全圭璧同瓦礫悲哉處士
心色動於尺檄曾念公子臣牽若執羈勒奇功隨物化
榮名今安覲所以大聖徒無為以為績軒冕豈不華一

喜生衆惕卓爾巢由存千載欲目擊

重陽前一日雨中遣興

九月每多雨吾齋况無菊蕭蕭松檜傍草色媚幽獨豈
乏同心人舒嘯振巖谷正悲落帽侶流浪至敗俗人生
太矜耀動欲垂簡牘苟無道德將所志固僕僕太樸散
已久言出成訕讟希聲疇可聞美人倚修竹

春日

松籟交遠風江濤落林杪虛庭客來稀時復嘯野鳥春

草漸萌茁碧甃瑩如掃豈必河漢水浩蕩勝潢潦百年
貴適意一喜九懊惱擺脫天宇寬境域無鉅小寒林亦
有筍寒澗亦有藻清虛苟自慰夢寐出塵表

送李少宰赴召

春雨集郊陌含生被華滋桃李俱無言好風時拂之大
人操化機不假鑪與錘張弛有妙理量劑諧羣思公昔
乘青驄已負梁棟姿明揚三十年海內獲所施清裁簡
帝心大雅為世師宿志幾見酬白首寧謂遲飛花初撲

缸晴江綠生漪遠節趨金陵新恩舞彤墀我有柳一枝
贈之比清詩廟堂惜寸朽萬物正熙熙

蓮北坐上分韻得獨字

冬日暄且妍鳴鳥集嘉木客從瀛洲來對我清湘竹銜
觴漱今古一獻再三祝各言崇令德不道位與祿肝膽
何相照鬚眉不空綠相送出前除裴回月中獨

孤筠情所託為陳竹坡賦

羣芳足春意愛此寒歲叢植之蘭畹傍下有流泉通主

人抱奇志徙倚興未窮琅然叩高節千古來淇風清幽
既絕俗彩鳳鳴其中偉然君子堂阿閣相玲瓏新雷起
龍春水搖龍葱素心諒有合散髮池水東

熊峰集卷七

欽定四庫全書

熊峰集卷八

明 石琚 撰

詩

七言古

搏蛟歌

白額猛虎已射殺長橋尚有老毒蛟殺人索百不可數
水南敗骨如危巢里中父老坐歎息三害未除凶已極

驕人好好勞人悲終朝對餐不能食嗟哉父老公莫憂
佩刀勇士吾姓周橫波叱水水不流幽陰鬼叫風颼颼
怒眸直視炯如電流血玄黃龍野戰寶刃光寒殺氣腥
批鱗拔角不足羨道上行人走決決閉門讀書方折節

畫灰

爐中火盡灰尚溫一撥再撥心翩翻披沙僅見赤瑩出
豁霧亦有明星存從容指畫續復斷石鼓籀文倉頡篆
巨擘縱橫分岸畔先王經國區溝畎太和茫茫猶未收

初為河圖後洛疇四隅五氣可按數七八九六紛相鈎
倏然蛇蟠忽鳥發天前地後擁諸葛亦知炎燼不可噓
尚冀燎原勢莫遏須臾寂滅難重尋悲哉此是佛氏心
此灰可滅佛未熄獨坐寒窻玩周易

麥場

上場新麥高嶙峋手擁雲漢批魚鱗赤騾雙拖碧玉輪
碾碎場頭青草茵咿軋車鳴石徑路轟騰馬躍長河津
雲烟豁開珠貝出金網決斷珊瑚新揚鋤直上一百尺

海風捲波生細塵較然神農別賢否糠粃不與穀實倫
青錢墜地量滿斛男顏歡悅女不顰明朝報神薦薏薺
十口幸免為饑人寄語城中冗食者百穀由來皆苦辛

秋夕

銀河玉露粧新秋露聲斜逐河聲流美人相望隔千里
對此翻令生百愁誰家簫鼓夜行樂寂寂那知客懷惡
知音不來可若何一任蟲絲護絃索

壬辰同年會詩得見字代陳天澤作

長安陌頭柳如線朝東暮西君不見人生何翅參與商
短景催人疾於箭憶昔初趨鴛鴦班幾人同獻麒麟殿
科協人乘龍背年時逢水擊鯢池便家君白簡猶遲留
上客青袍各葱蒨二十四回春草生昔人那似今人面
應門小子亦長成尚記嬉隨侍清燕世情離合那可陳
霜葉風萍曉花片孫放曾從父執行孔融令受通家薦
白雲南望繼餘歌願借清光入家傳

芟田行

芟田復芟田短刀長柄颼颼然開鎌先芟三百束村後
村前轟陸續南風吹場場土乾烏犍載車角轂觫去年
種麥麥不成今年麥熟家無贏為語農夫合勤儉汲水
聊舂麥仁飯

北望瀚海歌

北望瀚海何艱哉龍蛇雜糅兼風霾排天巨浪聲如雷
長船大艦為之催凌空歆石雜飛雨幽巖白晝號鬼嫗
砥柱頓折崩沙流驚人駭獸相視莫先語我亦欲乘桴

凌此萬里渚顛猿僵踣不敢前孤鳥却顧愁鍛羽嗟哉
海勢奚爾然歷姬不揚波當堯乃滔天坤靈海若不爾
謬且顛豈有黠蛟老毒潛深淵誰能豁浮雲扶日當空
懸斯道果流離舉世多瓦全及此始知大禹功不細孟
軻拯溺稱大賢九原大咍不可作伊當為誰者執鞭鞭
亦不可執意亦竟不舒濁水會有清上智本非愚哀哉
岌岌乎誰能下坂回奔車

東園行

桃花李花俱不言誰人高呼東名園洛陽才人惜暮日
淋洒春色翻清尊揮毫倚梧自擊節韞籍不道白與元
正值清和風氣好放歌一曲雲翩翻古來英雄不翅百
黃金煉藥亦不存秦皇漢武志極侈回首高閣成荒原
何如對此一杯酒且與明月心相論興闌還卧花陰下
不管春衣浣蘚痕

金穴行

君知黃金貴寧知金有穴崔嵬不踰仞中可萬夫宅穴

門紫氣橫亘天高金為壘深為泉飛湍濺沫幾千里湧
作十丈開花蓮池頭春水流活活蓮花顏色長如昨一
雙赤鯉當波翻萬點飢鳥向人啄嗟哉漢兒何乃慙隨
塵僕僕追彈丸彈丸欲擊飛鳥死安保骨肉無摧殘猶
勝東海老夫手皴裂白日披沙夜不絕驚濤推岸岸夜
崩傷哉見利不見血何如此穴利最偏窮人欲懇之青
天青天高高不可扣丹崖錦谷還依然人言此穴通揚
州禹貢三品其源流又言此穴接東岱萬水東奔盡歸

海吁嗟乎富貴福澤天與成請君聽歌金穴行

柳條歌

霸陵一夜春風到兩岸
毵毵飛絮早千條
弱線正勻黃
百轉流鶯笙復簧
朝朝折柳無重數
日日行人亭短長
離筵一觴歌一曲
前車未遠後車續
別多方恨柳枝繁
風雨明年又新綠

巨牛行

巨牛出東郊見虎良不畏
自恃形龐然文采亦森蔚
況

食三品芻曾為景升貴寧知吏卒不敢嗔乃是主人豢
養之深恩狂犇出柙若無敵欲與虎豹相噬吞履尾幸
未啗捋鬚安可論枯摧老角迸林藪賦灑膏血沾平原
方悔技藝薄勢歆難久藉平生誇詡皆雷同往日聲名
亦狐假嗟哉牛莫鬪虎欲來不如量力無後災天下之
事寧獨牛虎哉

春閨怨

蓮花燭短宵沉沉照見東家桃杏林畫梁影入燕夜語

寂寞東風愁正深
羅帷不閉鴨香煖
新歡直道春宵短
寧知冷枕漏偏繁
啼痕滴著羅襦滿
窓前花叢宿雙蝶
人生莫逢離與別

出鞘龍

漁陽上谷兵馬雄
復有老將卧軍中
城頭吹角戰士起
報國那能計生死
登壇慷慨抽寶刀
忽然百尺龍騰霄
三軍股栗舌半吐
御史中丞亦愁沮
嗟哉何為股栗與
愁沮已將身向君王許

貧家行

深山有鹿水有魚平原終日無寧居村中昨暮正長下
官府星夜馳文書父老訛傳閭戶役有馬出馬車出車
妾本貧家女少小得養息自嫁與良人日出官家力眼
見春澤生欲謀今歲食牛種猶逋巨室錢蠶桑敢望當
憲織城南草屋纔兩間千錢出易無人還夫妻祇有一
弱子不忍棄去携歸山已聞長吏稅間架恐有生死鞭
箠下

送穆使君入覲

肥累城頭寒月明
驪駒蹀躞車鏗鉤
殷勤羞此潢潦水
送君直上燕之京
燕京紫氣盛龍葱
九重霄漢飛神龍
闕下親瞻帝堯日
人間但憶君子風
誰言河陽好花柳
居然單父閒絲桐
一錢不忍勤父老
百里還見趨兒童
滹沱水壁一百尺
下聽活水雷行空
雪消冰泮水更闊
佇待雙鳬來自東

萊傭行

長安城中吏夜奔星飛趣對御史門抱蔬易粟入里巷
實以芥蒂生囂誼朱衣赫怒授大杖此惡不得從輕論
妻孥被繫盡泥首仰天拭淚聲暗吞嗟哉狐狸扇腥風
卻縛雞與狗那知白日狼豺行市中吏不敢問士反走
張公周公世豈有

題崔氏所藏豫章吳彥英歲寒三友圖

孝芬家藏三友圖崢嶸相照冰雪孤豫章名墨出道子
揮毫掃素能如此當軒一見毛骨竦已覺足踏空山裏

朔風如刀剝丘垤陰崖一夜玄冰裂萬壑千巖慘不舒
留翳塞塗桑縻折礫砢獨有松凌風踈篴亦與梅花同
鐵肝石膽可瀝視不獨能顯還能窮大夫森森氣千尺
衛武流風映淇澳誰言處士盜虛名林逋老去清如玉
憶昔東風繁盛時妖紅靚綠闕春姿桃花柳花各馳騁
笑人冷落顰栖遲富貴徒知輕澹泊寧知世態終搖落
萬種豪華一夕盡誰人顏色還如昨天王昨夜召匠氏
玉帛待獻明堂裏榱桷如雲匝地垂隆然巨棟中天起

伶倫奏樂來鳴鳳調珍列鼎庖人送笙簫曉入軒轅庭
和羹夜落高宗夢嗟哉遲速有命奚可誣丈夫未遇聊
躊躇知我豈無鮑叔義國士亦有睢陽鬚貞心勁節可
相保榮辱背棄非吾徒君不見今人但知暖勝寒多少
人家愛牡丹洛陽丹青布天下我看君畫心獨懽

春雪詞

蓬萊宮中夜飛雪蓬萊宮外春泉決宮娥起聽漏聲乾
小閣紅燈半明滅闌干十二堆瓊瑤君王禦寒猶服貂

殿前內侍撾鼓急報道鑾輿視早朝銀燭影隨花絮舞
煖雲香逐珮環飄街頭父老呼萬歲東樓那惜千錢費
呼朋酌酒話豐年不道今年米騰貴君王重念萬物槁
亦謂此是民之寶三春宜麥夏宜禾特勅六宮無汎掃
小臣更望風雨時一晦還收千種稻官不催租吏不討
肩負牛車滿官道小臣坐食飢亦好

題守堅李翁所藏牧牛圖

空山無人雲自流草色不喚王孫遊平波粼粼動烟縠

高柳拂地黃金柔路旁白石淨於几松膏竹杖亦易求
蒼巖翠壁幾千仞此中敢謂無巢由巢由巢由不可見
牧豎悠悠下長坂烏犍戢角春正肥短笛橫吹不知晚
已判乘月過前村不道林深路猶遠嗟哉長安豪俠千
金軀奔車騁馬光路衢掛角寧須二三卷徒聞十斛計
明珠春華秋葉忽飄轉誰憐數尺高珊瑚乃知抗志貴
世表眼底得喪真區區君不見豐城李翁今皓鬚積書
教子勤且劬人生意得會有娛霄漢豈與山林殊我知

翁意固如此不待臨風看畫圖

和杜子美醉時歌在七級作

獨上高樓望宮省北斗芒寒布袍冷尊中有酒筵有肉
醉飽翻河濯雙足東北望燕齊西南連汴宋君王有道
萬里清寶劔匣中長不用素餐大恐前人嗤為文更覺
無色絲讀書每破千萬卷交結時與英雄期豈不有仲
長統又不有雋不疑名言入耳足感激俊爽豁達俱吾
師海榴花開晚獨酌江風吹帆何磊落雨後蟬聲雜綺

絃林間月色搖銀壑詩情畫在霸陵岸筆鋒欲撼滕王
閣主人作宦猶未來田園一半為荒苔我亦安能居此
哉馬蹄獵獵踏風埃人生離合大如此為君且盡黃金
杯

契苾兒曲

垂拱朝民間歌契苾兒詞曲多媒豔亦樂之
妖也契苾兒為張易之小字云

君歌契苾兒妾按龜茲舞酒盡燈欲滅堂前鸚鵡語光

順門宣供奉郎蓮塘水暖雙鴛鴦象牀犀簾伏熊枕春
風夜簸花枝狂誰家少年眼如虎犂斷并州杏花雨

剖心慟

萬象宮中鐵鷲舞金輪壓碎中原土龍雛纍纍血刃紅
房州天子亦姓武開門告密死恨遲李家神靈那得知
英雄相顧入鼎俎棟摧梁折誰能支皇嗣寔不反臣心
端可明佩刀掣斷黃絲纓忠肝義膽照日星大呼徹天
鬼下聽周屠不語來屠醒簾前鸚鵡躑躅鳴刀圭桑綠

何多情君王從此脫奇禍保國存孤勲始大鼎爨誰勒
定唐功太常工與狄梁公吁嗟貴賤道可同萬世栗烈
增剛風

邯鄲行

邯鄲女兒未二十堂下理箏堂上食梅魂清澈藕絲柔
舞罷花枝困無力羅幃繡幙春復春可憐白壁滯風塵
陌上幾逢珠履客花前誰是錦袍人百年命分多不偶
不獨西池蒲與柳李廣不侯馮衍貧文姬流落明妃朽

傷心萬事難具論積恨烟絲春草痕

井陘行

陘山不高山有名幽并一覽俱分明鹿泉古水浸平壤
恒嶽遠峰朝上京丹崖翠壁相崢嶸亦有列石如分營
淮陰千載但遺廟土人至今知用兵義農虞夏忽已傾
首陽薇蕨春又生路旁老松抱世憤時復林間風雨聲

短歌行

苦霜凋綠華耿耿抱香死快刀割直絲一斷不可已翠

袖弓鞋雙黛眉香輪回首淚沾衣采雲一散無消息惆
恨綠鬟生雪絲

栢梁臺詞

栢為梁梓為柱紮金作臺高幾許未央官闕太液波萬
寶晴搖夜明樹日月星辰和四時梁王以下皆陳詩龍
顏喜溢豹文蔚虞廷賡歌再見之君王千載英睿姿惜
哉不逢皋與夔董生閉門長孺出平津閣中賢者誰雄
才逸發不自制始畧祁連山外地東來海上遇安期西

向宮中封五利乃知為君難為臣亦不易君王已悔人
未知白首始興搜粟尉栢為梁金為瓦治大國如大厦
一材豈宜輕用舍用舍一失害不輕瘡痍呻吟徧天下
空令中國至今人但說葡萄與天馬

落花嘆

牽牛花開香繞風纖指削成青玉筒三春曉露沁花蘂
飄飄仙珮凌天中當時鉛華稱遊冶盡日含姿粧不卸
樓頭月落尊酒空短景催人急如馬臨臺自覺朱顏非

倚闌淚濕金羅衣似恨秋風太相虐積雨陰陰凋綽約
啼鶯無復艷陽時乳燕空驚舊簾幕春來秋去何足歎
君不見五族七貴皆高冠朱樓畫棟連雲起中有殊麗
多邯鄲明珠翠羽綴首飾紫檀紅玉雕闌干一朝桑田
變滄海脂房秋水空汎濶誰能使鳥不飛兔不走肘後
黃金印如斗庭前有花尊有酒高歌一曲三千杯長與
南山作賓友

別離曲

十里紅亭憶君別落花飛絮飄香雪垂雲偏礙復雙冠
野水空漫舊車轍歡娛未盡早睽離綠損紅媽當怨誰
六貴五侯君自取如何教妾度芳時君去不來妾已老
夢魂猶繞紅亭道

中秋對月

日落崦嵫雲半赭烏鴉啼碎鴛鴦瓦海東雪浪搖水城
驚落銀河向城瀉瑤輪隱隱驂素龍木犀花間雙兔雄
開元李郎厭花塢霓裳一曲聆天風長生殿前人對月

漁陽鼙鼓兵如雪滿路楊花碎馬蹄至今坡草沾鸞血
君不見今人古人一杯酒誰人杖淚誰開口噫啞頻驚
在戶庭西風不獨衰蒲柳子卿去日尚丁年定遠歸來
空白首請君當筵對月聽高歌惟有尊中月色多

寒雨曲

夏初一雨直徂冬百草落盡黃金茸庭前老樹枝幹禿
上有古苔如錦封鳥巢冒葉飛不起繚繞飄颻日千里
夜深忽觸西南風吹作新腔阿滿子巢中寒鳥鳴唧唧

寘下愁人抱雙膝龍泉不出佐清時繡徧蓮花秋水色

燕燕謠

燕燕飛入翠微越羅為君裳齊紈為君衣披香殿裏雙
宿栖茅次舊壘生光輝張公子來擊鼓按紅牙歌金縷
一曲陽春掌中舞弱佩隨風墜鳴雨君王為爾金刻櫨
可憐窠成不將雛腐木作柱能幾時棟焚火滅猶未知
廢昭臺徙長信前雉雒後星隕惱亂春心君莫問錦衾
夜夜裏官奴溫鄉老人朝不甦

答秋官蔡從善自南都見寄

讀君千里書上有加餐飯為君起坐明月前兩耳清霜
響枯蔓窻間閃爍燈夜紅水龍朝西雲暮東十載同心
歌伐木如今愁鬢信飛蓬憶歌君詩對君酒慷慨當筵
幾開口次公不獨帶醒狂正平本自輕豪右南山當戶
乍卷簾北極關心共昂首心知萬物固不齊鳳凰高飛
寧顧雞羣葩落盡老松出樂國忽有飢兒啼人生何苦
必得意有時霄漢等塗泥但願丹心不負青天與白日

青燈黃卷相對生虹霓龍泉夜蹴祖生舞黃鶴朝追崔
顥題豎儒報國乃如此鍾鼎旂常豈吾事素心未愜憂
孔多薄分如蝸命如蟻青山抱病守荒廬寥落鄴侯三
萬書虛名已負故臺價廣陌誰誇駟馬車奉君之書濺
吾淚愧無篇章報瓊佩竹笛中郎應未忘小冠子夏真
狼狽哀歌一聲動明月的寒星耿華髮林幽幽兮風
發發水層冰兮草寒色車輪催兮馬蹄脫安得往兮附
鴻鵠為君強賦長歌行莫訝吾歌多苦聲

冷齋對雪

蕪蕪亭南夜飛雪瘦驢嘶羣鳴不絕五更漏點滯銅龍
朔吹蕭颼戰簷鐵書生忍凍貪熟眠獨裹布衾雙足拳
龍泉不用寶弓弛老兔欺人來屋前盧家老婢赤脚走
東郭先生空辨口英雄富貴兩難欺寂寞黃公舊壚酒
登樓望城西諸山

西湖山水清且幽漢宮恩澤賜旬休鳴鞭走馬出廣陌
一望太行無盡頭儲郡喬王并時俊相與共上湖邊樓

看山酌酒無鼓吹自作歌詞還自謳飄颺始覺霄漢迴
搖落忽驚花樹秋浮萍滄海易離合芳草綠波誰去留
舊時諧笑果一夢當日池臺成獨遊頽雲坐見墮平地
春水滴滴西北流不知古壁滿苔蘚曾有幾字垂銀鉤
人生百年驥過隙金丹駐顏那易求有名莫上鍾與鼎
留取爭光烟月洲

題沈石田遊張公洞詩畫

南樓午夢袪復生長風掣卷雙眼明姑蘇沈翁得名舊

不獨畫好詩更精
敷金山頭片明出
張公洞口春雲橫
躋攀始信老益壯
貌寫不遣神遺情
立當空谷虎豹栗
吟入窈幽夔魍驚
不知元氣已滲泄
宛見石筍俱崢嶸
層巒絕巘觸遐思
百歲幾日能閒行
縱無健步鬬石角
願借地主前塵纓
江湖亦與廓廟等
富貴何止蟬翼輕
青山白髮自夙約
今我秋霜已數莖

墮鈿怨

猩紅琥珀金指鈿
一日不曾離妾身
指文鈿花細相映

綠紗夜繡蘭缸新墮來恐在泥與土掩袂含情獨無語
寶釵珠履任輕拋女伴爭知妾心苦節旄雖落馬骨存
一夜為君傷舊恩

臨澗行

兢兢復兢兢臨澗遊子泣且行孤鴻夜保萬里翩逸驥
朝踏三春冰洪濤可畏髮欲監斷岸未圻神先驚長安
少年惜金紫白日彎弧射封豕凌煙一筆萬死輕冷笑
王陽但為子人生莫大君與親家家養子圖出身此身

一出難自保驅馳䟽附猶因循丈夫何苦不若人但惜
無名指屈信揮戈拔劍出門去長路風塵多苦辛

大學幡

博山爐小煙曲曲漢鼎雖存已虧足蒼生但怨皇天癡
不信高安好皮肉長樂宮中斷袖起相國府前人倒屣
關東王母正行籌日下白虹空貫珥東朝將相無所倚
何事復令司隸死誰能砥柱障頽波不若彈冠伏都市
孤幡揚揚生烈風海內是非須有公浮雲蔽日不作回

天功正氣自可凌蒼穹老臣若肯存精忠遮道一言羞
殺翁

再作太學幡

三尺布踰仞竿太學諸生朝舉幡誰其救者司隸冤回
天轉日諒不難請君先為遮道言馳道不可行使者安
可閉車馬已沒官有過各宜悔但願相公屈於理無使
司隸屈於勢庶為邦家保廉耻廉耻一壞公莫輕拜塵
頌功風始成

晚對西窗

赭雲留照窻綃赤煖透山房梅夜實梁間棲燕語未休
石上龍池翠如溢山人有興酒滿尊旋掃花堦待月出

迎秋詞

井梧葉墮涼颼發聽盡秋鶯待明月畫闌夜悄珠露垂
銀漢飛湍濺城闕新螢乍起促織鳴誰家砧杵纔數聲
夜涼始覺素幃爽不應夢逐相思生相思復相思美人
來幾時百草尚欲望秋實何處蓮花無藕絲

紫絲怨

卷八

妾本瀛洲洲上女自小不曾窺外戶感君恩愛與君深
霧閣雲甍杳無路空將紅葉寄相思亦有雙魚傳尺素
君家與妾隣苑牆暮暮朝朝幾斷腸夜雨燈寒怨瑤琴
春風淚落失紅粧知君自是文章士妾亦能吟書與史
鳳胎龍子照芳春盡道風流世無二豈惟君情與妾心
兩家大人亦如此不知妾命自秋蓬去年謬許戎家子
君雖多情情亦薄當時但見功名樂携書挾劍遊上京

寧憐風雨凋花萼，妾亦忽忽去鄉里。
香書未動悲風起，萱花堂前一見君。
飲恨吞聲隔生死，君雖不言妾已知。
似恐鴻鵠滯遊絲，妾身雖稱窈窕安。
受恩知恩不復疑，宿緣已付金井索。
往事空悲紈扇詞，君乘青驄妾乘車。
白蘋洲前相送時，明霞有意伴孤鶩。
清夜何人歌伏雌，君恩深沉比滄海。
能保明年妾身在，試將象篋表幽衷。
更結同心待君解，君上青霄應念妾。
小字紅箋仍萬疊，輕塵霏霏蕩紅雪。
一步一顧腸斷絕，寒泉墮灘水鳴咽。

銀鈿中分寶釵折繡韉蕭蕭輪曳古楊無風下黃葉
天長地久今朝別有夢難逢淚空血蒼天蒼天高截截
人生何為罹此業為君一死盡妾心他日君來空馬鬣

遠水曲

春水深且遠扁舟不可度纖素空牽衣飛黃已前路妾
意如孤舟君情似浮漚浮漚一散無尋處短棹輕帆日
夜愁

新涼曲

碧梧蕭蕭金井寒露華瑤月瀉金盤籬間螢火濕不起
仰見銀潢飛素湍紵衣淒風涼更薄絳蠟生花照絃索
草蟲似答風樞吟窻禽不與書燈約百年光景轉眼殘
君臣際遇古所難一杯尚可盡餘興長嘯秋空登石壇

舖糟吟

高堂置酒白日驩顛裳倒屣意未闌主人不惜珠璧碎
剗麟剝鳳充朝餐西池鼓發縱牛飲爛醉掣斷曼纓冠
狂歌劇舞無夜旦宮商錯亂知誰彈春缸綠沸壯士喜

紅籠曉開鸚鵡死盡脫金貂豈論錢不妨麴蘖多成市
湘南遺老坐歎息斜日烘顏亦酣色江上何人更唱歌
千愁萬恨無人識

斗酒吟

我有磊砢懷斗酒不能下有時忽一作中夜每自詫大
呼滿掬槽頭珠千滴萬滴恨未除昆陽虎鬪壯士走龍
韜安用囊中書先人遺我百金釵我每佩之生死俱赤
蛟青兕不試用風霜枉殺江南魚叱奴停杯莫更酌拂

拭龍光倚太虛

寒夜曲

霜風試嚴摧碧疏翠
綰錦鱗屈不舒
蕭蕭古城月西上
孤鴻時作空中書
西湖往日多芙蕖
山明水麗畫不如
與君一別歲月改
蒼苔落葉填前除
時移世換何足惜
瑤箏翠管無顏色
繡被猶霑雨露恩
朱闌不似芳菲日
青燈作花垂
黦黦沉憂銷骨人
豈知寸心千里託明月
夜夜期君望月時


擬古烏夜啼

城上柝漁舟夜寒城下泊城頭烏啼月欲落豈知城中
人苦樂錦坊織兒誇織錦蠶婦采桑兼采椹千金買兒
那復忍

蓮北座上分韻得新字

寒空露下苔色新西堂掃月迎清賓天風吹落鳳池珮
爽籟逸出東華塵主人遠致碧蓮酒況有水陸羅奇珍
誇尊事往不可見意古獨薦藻與蘋牀頭錦軸卷復申

墨池寒浸龍生鱗
枯藤弱蔓滿籬壁
眼中書法誰先秦
西山秀色墮杯影
長安落葉隨行人
寒烟不銷萬古碧
野草尚憶昇平春
城頭杵築聲振振
四坐斂袂各定神
魚頭叅政自骨鯁
蓬萊詞客何嶙峋
青蟲吐絲不盈尺
照我短髯明如銀
相看一笑日欲暝
松畔鶴聲凌紫旻



熊峰集卷八